

Khayanga Ni Khaamuka Kheewe

Author - Ursula Nafula

Illustration - Catherine Groenewald

Language - Lumasaaba

Level - Longer paragraphs

© Ursula Nafula 2014

Creative Commons: Attribution 4.0

Source www.africanstorybook.org

ASb
approved



Khayanga Ni Khaamuka Kheewe

Ursula Nafula

Catherine Groenewald



Mu bulamu bweewe bwoosi,
Khayanga anyoolatsaka tsikhabi nga
tsibirira mu khamuka akho.



Aryo waasutatsaka khaamuka buli oosi isi atsy'a. Ne buli isi aabiratsaka oosi, babaandu beyaanga naluundi nga bereebana nari, "Khaamuka kha saambo shiina khano? Lwekhuuba abe baakhubonatsakakho khaamuka khakhafwaana kharyo ta."



Aabawo khaalekho, yabayo umusaani mutweela, n'umukyelama weewe, nga bali n'umwaana wekhaana mutweela yenyene, isi baalaanga bari Khayanga. Nga Khayanga woolisile kimiiko likhumi kye buukhulu, paapawe ne maayiwe baafwa.



Umulebe ukhali uwe ango abweene ta, isi balaanga bari Rosa, waayila Khayanga khuumenya ni naye. Ne Rosa abe waaloosiwala naabi, baamenya mu butaambi buukali naluundi nga bali bonyene.



Uri akangamukha ari, Khayanga waawulila likono lilifwaana nga lya maawe, nga liloma liri, Mwaana weefwe. Yangala bisiintsa bibiramile aasi. Wiikhe mu meetsi ni nabyo. Bitayile kameetsi umale usiingile bikyele byoowo. Nga waamalile khuusiinga, funyikhilila. Kila Khayanga waaloondelela shiilakilo waakhola nga likono ni lyaloma. Ne naakangamukha, waawulila bisiintsa bye khaamuka bikeenda mu bikalabo byeewe, nga biyuungaka atweela, khukhwikelamo khaamuka luundi.

Paapa ni maayi! Bona khaamuka khaatikhile!
Khaamuka kheesi mwaamba! Ise ikhole ndyeena
maayi ni papa? Imaambile shiisa, muntsokese she
khuubonelakho muri mushiili ni nase!



Khayaanga waatsya khu n'gani tsa
paapawe ni maayiwe, khuubalilila
kamasika nga buulamu bweewe ni
buli buubi naabi.



Lwabawo lutweela, nga Khayaanga kaatsya khu n'gani tsa paapawe ni maayiwe, Khayanga waabona khaamuka khaamiliwu khaarura akari e tsin'gani iya paapawe ni iya maayiwe.



Ne imbolambola waabusanisa bisiintsa bye khaamuka tsana. Waabihaamba muukhono, nga eemba kumweenya ari:.



Lutweela waatsya i meetsi khuutaha kameetsi. Ne n'aaba nga enama mu meetsi waareremukha. Khaamuka kheewe khekuunya khwibaale, khaatikhamwo bisiintsa bitaru. Khayanga waaba mu mutaambo kumukali.



Khayanga waawulila kumweenya nga kwaamila mu khamuka. Kweemba kuri.

Khayanga, e e Khayanga! Mwaana wase umukanwa!
Iwe s'uli wenyene ta, umukanwa! N'uyile khaamuka
akha, umukanwa! Khasutatsake buli isi wutsya yoosi,
umukanwa! Kane khakhuwosawose!



Khukhwaama abweenewo, Khayanga
wakyendatsaka ni khaamuka buli isi
atsya yoosi. Nga buli lweesi
aakhaasutsakila, akhebulilatsaka
maayiwe ni paapawe,
syaamukobosamo kamaani, ni
ewulila buulayi.